

Gui'ch guxhaal San Pabl loj ree bén Filipos rlliladx Jesucrist

Rugajpdioz Pab Bén rlliladx ree Jesucrist

1 Naj Pab con Timoteo, raguieenan sirv loj Jesucrist. Caycaan gui'ch guie par lëjt najdi Bén rlliladx Jesucrist luguiedx Filipos, në par ree Bén rniabee lojdi ruluü tää reeman xtiidx Dios në ree Bén rüjn yudar Bén rlliladx ree Jesucrist. ²Dux Dad ree Dios në Dad Jesucrist güünle' lëjt, yabe'cdxe tää reeman lëjt.

Rbejdx rniab Pab Dios por ree Bén rlliladx Jesucrist

³Zianczi chi rusaaladxan lëjt, rudën quixtää loj da Dadan Dios. ⁴Abi' zianczi chi rbedx rniaaban laaman dád nix ru luxdon, rbedx rniaaban laaman por gradi. ⁵Din diizd dxej ni guzuloj rlliladxidi Jesucrist dxel guzuloj raguieen ree tijbzi xgab par guire'ch xtiidxaman xt yan. ⁶Ragbeechaawan guial diizd chi guzuloj rlliladxidi xtiidx Dios, laaman cusnuu cayagnë lëjt din gaquidi zi'c rayal xt dxej gui't Jesucrist stijb. ⁷Najczi guial günan xgab zian por gradi, din rusaaladxan lëjt, zi'c chi yu'n

ladxguiib ziangajc chi culün conin naj diidxli xcwent Dios din tibloj cayüjnle'man dunuj ree. ⁸Dios ragbee guial dád rusaaladxan lëjt guial rënan lëjt zi'cgajczi rën Jesucrist lëjt. ⁹Rniaab tää lojman din mazri guiën lasa'di, abi' guixie guixie gusnuu guixhialaman xquiarguiejndi din gagbeedi ni rayal güündi, ¹⁰din chile' cwedi ni naj mazri zagdxe. Abi' zian guibandi naya sin dol niz loj Dios, chitää xhie naman contr lëjt dxej ni gui't Dad Jesucrist stijb. ¹¹Abi' por laaman zajc guibandi zi'c rën Dios zi'c balüü Jesucrist lëjt din gap ree bejn Dios mazri respejt guilies tää reeman xvaloraman.

Yabajn ree par Cristo

¹²Compniar raliduladx ree Jesucrist, rënan gagbeedi guial graczi ni guza'can cayüjn reen yudar persi care'ch xtiidxza'c Jesucrist. ¹³Abi' yan, gra ree Bén yu' lën palas në gra ree Bén zojb niz guie ragbee reeman guial yu'n ladxguiib por guial najn xbejn Jesucrist. ¹⁴Abi' chi baguiaa ree compniar raliladxnë' ree Jesucrist guial yu'n ladxguiib, mazri

guzudxi'ch reeman abi' zien da't reeman guyu luxdoo guitie'ch reeman xtiidx Jesucrist sin gualrdxeb.

¹⁵Per diidxiczi yu' reeman rtie'ch xtiidx Jesucrist guial rdédloj reeman naj abi' rēn reeman gac reeman mazri b́en zobjloj. Per yu' reeman rtie'ch xtiidxaman guial naj xixgab reeman zagdxe. ¹⁶Yu'za reeman guial rēn reeman Jesucrist, catie'ch reeman xtiidxaman abi' ragbee reeman guial yu'n ladxguuib guial za'dxi'chnē'n xtiidxaman guial najcan diidxli. ¹⁷Per yu' reeman ad walit reeman naj xixgab reeman zagdxe catie'ch reeman xtiidx Dios, naabzi par guilies bejn xvalor reeman abi' xixgab reeman naj guial gusagdiaj reeman naj mazri lēn ladxguuib guie. ¹⁸Per achet güünan majsi zagdxe naj xixgab reeman o ad zagdxe ya, contzi ma catie'ch reeman xtiidx Jesucrist, laan naj ni rabaanē'n abi' mazri yabaan. ¹⁹Din ragbeen guial yariin loj ni cadēēdan guial cabejdx canabidi Dios por naj nē guial cayagnē xSprijt Jesucrist naj. ²⁰Naj ragbee guial ad yu't dxej guslaa Dios naj yaya'nxtun, sin gualrdxeb gulūn bejn ree xhienaag ra'pan respejt Jesucrist majsi nabanān o majsi guiētan. ²¹Din par naj la'tgaj nabanān cayūnan laaman sirv, abi' bal guiētan mazri zagdxen din ma gazun con laaman. ²²Per bal gabajnran loj guidxliuj guie, gusnuu günan sirv loj Cristo zi'c rayal, per ad ragbeetan conin naj zagdxe par naj. ²³Din loj grop ree ni guin dád nawēēgan par gaben conin günan, tijb rēnan yaca' Dios naj din gazun

con Cristo, laan naj mazri zagdxe par naj, ²⁴per por lej́t rüjn naguiejn gabajnran. ²⁵Abi' naj ragbeen guial gabajnran din günan lej́t yudar gusnuu chinalidi xnejz Dios, din chu' luxdoodi gusnuu chililadxidi Jesucrist. ²⁶Abi' chi guidganan lej́t stijb, chu' ni yabaanēdi gudēē tēēdi quixtēē loj Jesucrist por ni beenman por naj.

²⁷Per ganin lej́t, gol been naguiejn gol gubajn zi'c rayal, zi'c rēb loj xtiidx Jesucrist. Din bal guidganan lej́t o bal id zialan, per rēnan guiguiejn guial za'dxi'chidi nadxag tēē lasa'di abi' tiblojz cayūjndi naguiejn catie'chidi xtiidx Jesucrist. ²⁸Ad guidxebidi b́en rdxe'ch lej́t. Zian guiguien guial ma canijt reeman loj Dios, per lej́t zian guiguien guial ma rajpidi perdon zēēd loj Dios. ²⁹Din ad cwabeetidi par chililadxzidi Jesucrist, cwabeedi nē par sagdiajdi por laaman. ³⁰Lej́t con naj tiblojz caydüüd ree tarbajw par yatie'ch ree xtiidx Jesucrist, ma baguiaadi xhienaag rdēēdan tarbajw por xtiidxaman abi' yan caguiejndi guial cusnuu cayūnan mazran.

Nadxag yadxu' ree por Jesucrist

2 Yan, zi'c ma yu' luxdoodi zagdxe por Cristo, zi'c ma yu' luxdoodi nix guial rusnuu rēn lasa'di, nē zi'c ma nabannēdi xSprijt Dios nē zi'c yu' luxdoodi nix con lasa'di, nē zi'c raya lasa'di. ²Gol basnuu gol gubajn zian din yagu'di luxdoon nix. Gol gubajn, gol guyēn tēē lasa'di tibloj, gol gojc tijbzi, gol been tēē tijbzi xgab. ³Ad sēēbladxidi güündi gan loj

ree lasa'di o guilies xvalor lęjt gajc, mazri zagdxo gol been naya, gol been tēē xgab guial stijb lasa'di mazri lasajc guial lojdi. ⁴Ad bal chu'di xgab por lęjtzi, gol guyu xgab por stijb lasa'di.

⁵Gol been xgab zi'c been Jesucrist xgab. ⁶Din majsi laaman naj Dios, per ad guzudxi'chtaman guial nięjbaman laaman naj Dios. ⁷Basa'n xguialrniabeeman persi bi'taman loj guidxliuj guie zi'c tijb mojs abi' gojlaman zi'c tijb bęnguidxliuj. ⁸Abi' chi gocaman zi'c tijb bęnguidxliuj beenman naya abi' bazoob xtiidx xDadaman, xt gųjtaman loj crųjz, majsi ni natu naj guial ręjt loj crųjz. ⁹Zeel dád guialrniabee naroo badēē Dios lojman, badēē tēēman lojman laj bejn ni mazri lasajc loj gra laj bejn. ¹⁰Din chi guiguiejn ree bejn laj Jesucrist, guzuxib gra reeman lojman, zi'c ree ni yu' xanyabaa, nę gra ree ni yu' loj guidxliuj, nętēē ree ni yu' lęn liuj. ¹¹Abi' gra bejn guięb guial Jesucrist naj Dad, zian guilies reeman xvalor dux Dad ree Dios.

**Xbejn ree Jesucrist naj zi'c
tijb guij ni rulaa bacha'**

¹²Zeel compniar raliduladx ree Jesucrist, zi'c ręnan lęjt abi' rnin lęjt guial zi'c bazoobidi da diidxan chi guzun con lęjt, ziangajc gol bazoob da diidxan mazri yan guial za'n zijt. Con guialrdxeb nę con respejt gol been zi'c rayal gųın ree bęn ma naj perdon. ¹³Din por Dios zęēd xgabza'c ni rųjndi, abi' laaman ragnę lęjt din gųındi zi'c ręnman.

¹⁴Gol been gra ni rayal gųındi, achet guial ad zayuladxtidi achet

tęēt guial tildiidxidi, ¹⁵chitēē xhie guinee bejn lęjt o chitēē xhie xfaltidi yadxelj reeman. Lęjt najdi xi'n Dios gol gubajn naya niz loj ree bęn ad zinalt xnejz Dios, bęn rųjn ree ni guijdx. Din gaquidi zi'c tijb guij loj reeman, zi'c tijb guij ni rulaa bacha' lod nacay, ¹⁶guial za'dxi'chnędi xtiidx Dios ni zidnę guialnaban. Abi' zian yabaan por lęjt dxej ni gui't Jesucrist stijb guial gagbeen ad bentan dxiin xlia' ad bizaa tęētan xlia'. ¹⁷Din guial riladixidi Dios laan naj zi'c tijb gon par laaman, abi' nix yu' luxdon majsi guiętan din yayaaloj gon guin guial rabaanę'n gradi. ¹⁸Yan ziangajc gol babaa, gol babaa zi'c rabaan.

Timoteo nę Epafrodito

¹⁹Dad Jesucrist gagnę naj din diob gaxhalan Timoteo lod zobjidi din xhienladxan chi gagbeen xhienaag riga'di. ²⁰Din tijbzi Timoteo yu' lęjt xgab zi'c yu'n lęjt xgab. Achut bęn ru lęjt xgab zi'c laaman. ²¹Graczi reeman ru xgab per por laagajc reeman, ad rut reeman xgab por ni ręn Jesucrist gųın reeman. ²²Per ma ragbeedi xhienaag naj Timoteo, ma ragbeedi xhienaag cayųjnman naj yudar persi catiechan xtiidx Jesucrist. Cayųjnman naj yudar zi'c rųjn bejn xDadaman yudar. ²³Zeel ręnan gaxhalan laaman din guitixlojman lęjt, gagbeezan xhienaag gariican loj cwent guie ²⁴Dad Jesucrist gagnę naj din diob guidgana quijb naj lęjt.

²⁵Abi' rulųı rųjn naguiejn gaxhalan da miwan Epafrodito

ladxidi. Ĺejt guxhaal laaman din giünman naj yudar loj ree ni ryaadxan. Abi' zian cayünman naj yudar, tiblojzi cayzaagdiajn. ²⁶Dád rēnman guidganajman ĺejt abi' dád yu'man xgab guial gogbeedi gogxuuman. ²⁷Abi' walican gogxuuman zamer niéjtaman. Per baya Dios laaman, abi' ad laatzaman, nēgajc naj bayaman, chitēē chu'naya luxdon mazri zi'c ma guyu nayan. ²⁸Zeel diob gaxhal gajcan laaman din yabaadi chi guguaadi laaman stijb chitēē chu'naya tēēn mazri. ²⁹Gol babaa, gol baca'man guial najman tijb du lasa' ree b́en rliadx Jesucrist. Zian gol guyēn gra ree b́en naj zi'c laaman. ³⁰Din zamer niéjtaman guial rünman sirv loj Jesucrist, guzujman loj guialgüjt guial beenman naj yudar loj ni ad bile't nünj quijb ĺejt naj yudar.

Ni mazri lasajc

3 Yan, compniar raliduladx ree Jesucrist, gol badxe' luxdoodi zagdxe por Dad Jesucrist. Par naj achetan guial ganin ĺejt diidx ni ma rni gajcan tijb, din par ĺejt lasajc ree diidx guin chitēē chu' ni gusquiee ĺejt. ²Gol gojp cudad con ree bentont, b́en ad nadēdguient, benmal, b́en rünj ree naguiejn din chu' ree bejn xen b́en Israel. ³Din mazri lasajc sen ni raya'p ree, abi' sen guin naj guial diidxli zunaal ree Dios por xSprijtaman b́en nabajnnē' ree, abi' rabaa ree guial ma rayagbee ree nayajc ree xbejn Jesucrist, per ad por guial zunaalt ree costumbr. ⁴Majsi zajc gales da valoran guial zinaalan gra

ree costumbr, per bal yu' b́en rlies xvalor gajc, nēgajc naj zajc gūn zian. ⁵Din chi goc toxman goolan, badxe' reeman naj sen ni ru ree b́en Israel. Abi' b́en Israel naj, loj xdiaa Benjamín zialan, rniēn diidx Hebreo din xi'n ree b́en rniee diidx Hebreo naj. Benan gra ni rniabee ley din b́enfarisew gojcan. ⁶Benan zi'cgajczi rünj ree b́enfarisew, zeel xt guzunaalan b́en rliadx ree Jesucrist din gūnan laa reeman ni mal, benan gra zi'c tal rniabee ley abi' achut zajc niējb guial ad cayūntan zi'c rayal. ⁷Gra ni benan nadxel, par naj dád lasajcan nadxel, per yan achet lasajcan par naj, din yan Cristo mazri lasajc. ⁸Abi' achet ni mazri lasajc guial loj ni nūnbeen Dad Jesucrist, por laaman gra ni benan nadxel ma basa'nan tiblād, naj reen zi'c tijb guix par naj din nabee Cristo naj guidiblagaa, ⁹abi' gacan tijbzi con laaman. Ad naladxtan por guial rūnan zi'c rniabee ley achet dol ra'pan niz loj Dios, naladxan por guial rliadxan Jesucrist, din por guialrliladx guin ma naya bejn loj Dios. ¹⁰Zeel rēnan gūnbeechaawan Cristo, gūnbee tēēn guialrniabee ni basban laaman, rēn tēēn gadaanan xhietēēz loj guialrzagdiaj ni gadēēdan zi'c gudaanman, ma guidxin dxej gacan zi'c rayal gacan por xguialgüjtaman. ¹¹Din yu'guican guial yabanan zi'c baban Jesucrist.

Ni gunee Dios xanyabaa

¹²Ad canitan lojdi guial ma bayaaloj benan gra o guial najn benza'c, per cayūnan naguiejn din gacan zi'c rēn Cristo gacan

diisd chi guzuloj rniabeeman naj.
¹³Compniar raliduladx ree Jesucrist, naj rni lějt guial ad wayaalojt gūnan zi'c rayal, per cayūnan naguiejn din yayanladxan gra ni benan gocli din gac gusnuun par delant, ¹⁴din yayaaloj gūnan zi'c rayal din chile' gaca'n ni gunee Dios xanyabaa zi'c gurejdxaman dunuj ree por Jesucrist.

¹⁵Abi' dunuj ree guial ma rayagbee ree zagdxe ni rēn guiēb xtiidx Dios, rayal yaguieen ree xgab zian. Per bal garen naj xixgabidi guial loj ni canin lojdi, Dios guliū lějt conin naj diidxli. ¹⁶Per rūjn naguiejn yabajn ree zi'c ma rayignia' ree.

¹⁷Compniar raliduladx ree Jesucrist, gol gubajn zi'c naban, gol baguiaa tēē xhienaag naban ree b́en naban zi'c naban. ¹⁸Din zien volt ma rnin lojdi abi' yan caydxi'nan zatijb, xt ronan canin lějt guial zien ree bejn naban zi'c ree b́en ad rliadxt guial gūjt Cristo loj crūjz por dux xtol ree. ¹⁹Abi' ree b́en guin castizi naj ni rbēz laa reeman din mazri ruladx reeman gūūn reeman ni dxuudx. Abi' luar yatu reeman por ni rūjn reeman aal mazri rlies xvalor reeman guial mazri rūjn reeman xgab por ree ni yu' loj guidxliuj guie. ²⁰Per dunuj ree ma nayab ree xanyabaa abi' caylějz ree guial diisd xanyabaa gui't Dad Jesucrist b́en gudix por dux tol ree. ²¹Laaman naj b́en guchaa dux cuerp ree ni raya'p ree loj guidxliuj guie din gacan zi'c naj xcuerpaman xanyabaa. Abi' gūūnman zian con guialrniabee ni rajpaman par nabeeman gra.

Gol badxe' luxdoodi zagdxe por Dad Jesucrist

4 Zeel compniar raliduladx ree Jesucrist, rēnan lějt rēn tēēn guidganan lějt, lějt rgu' luxdon zagdxe, abi' najdi zi'c tijb prem par naj, gol guzujdxi'ch loj ni rliadxidi Dad Jesucrist.

²Yan, rniababan loj Evodia nē loj Síntique din guidxag cwe reeman guial naj reeman compniar loj ni rliadx reeman Dad Jesucrist. ³Abi' ziangajc lūj compniar ni cayguieen dxiin tijbzi, rniababan lojl din gūūnl yudar b́engunaa guin ree din laa reeman been naj yudar bire'ch xtiidx Jesucrist nē Clemente con ree ben ren, gra reeman ma yu' laj loj libr ni yu' laj ree b́en guiban tiblayaa con Dios.

⁴Zianczi gol badxe' luxdoodi zagdxe por Dad Jesucrist. Naj rni lějt iGol badxe' luxdoodi zagdxe! ⁵Gol been naguiejn gūūnbee gra bejn lějt guial najdi benza'c. Gol badxe'guijc guial zamer gui't Dad Jesucrist zatijb.

⁶Ad rayalt chu'di xgab por xhienin, gol gurejdx gunab Dios por gra ni rzajquidi, gol gurejdxaman gol badēē tēē quixtēē lojman. ⁷Dios yabe'cdxe luxdoodi, zro' rabe'cdxeman luxdoo bejn mazri guial loj ni naladx bejn, abi' laan naj ni gagnē lějt din yayaalyuj luxdoodi yayaalyuj tēē xquiarguiejndi guial ma najdi tijbzi con Jesucrist.

Gol badxe'guijc ganax ni zagdxe

⁸Naga gad lox gūnan gui'ch guie, compniar raliduladx ree Jesucrist,

rnin lějt gol badxe'guijc ganax ni diidxli, ni rayal respejt ně ni naj xnejz. Gol badxe'guijc ganax ni rűjn sirv, ni naj zagdxē ně ni rayal gűn b́en zē xnejz. Gol badxe'guijc gra ni naj zagdxē ně ni guilies bejn xvalor.

⁹Gol been zi'c basidan lějt, zi'c ma balűn lějt, gol been zi'c rnin lějt zi'c ma baguiaadi benan, zian gagnē Dios lějt b́en rabe'cdxe luxdoo ree bejn.

Ni badēed ree b́en filipos loj Pab

¹⁰Dád rabaan por Dad Jesucrist guial ma basaaladxidi naj. Ad canitan bayanladxidi naj, canin zian guial ad gojctri nűjndi naj yudar. ¹¹Ad canitan zian guial cayaadxan xhienin din ma basidan gadēedan con ni ra'ptzan. ¹²Ragbeen xhienaagan chi naban bejn loj guialprob ragbee tēen xhienaagan chi achet ryaadx bejn, din ma basidan rdaanan ni zēedtzi, bal rawan o bal id rawan, bal rűjnan naj sobr o bal ryaadxan. ¹³Rajc rdaanan ni zēedtzi con xyudar Jesucrist. ¹⁴Per zagdxē naj ni beendi guial beendi naj yudar loj ni cazaagdiajn.

¹⁵Ragbee tēedi guial chi briin niz Macedonia din suloj gatie'chan xtiidxza'c Jesucrist, lějtzi bazaladx xhienin lon guial

loj gra ree guiedx lod ma riladx reeman xtiidx Jesucrist, zi'c benan lějt yudar ziangajc beendi naj yudar. ¹⁶Ziangajc chi guzun luguiedx Tesalónica chi biaadxan xhienin, bēlczī volt beendi naj yudar. ¹⁷Ad cayguiltan mod din gűndi naj yudar mazri, ni rēnan naj guial mazri yaya'ndi zagdxē loj Dios. ¹⁸Ma baca'n gra ni guxhaalidi con Epafrodito, yan xt sobr rűjnan naj, par naj ni guxhaalidi naj zi'c tijb ni nadxoon o tijb gon ni ruree nejxh, ni ruladx Dios. ¹⁹Zeel Dios gunee lějt gra ni ryaadxidi por ree ni za'c ni rajpaman xanyabaa con Dad Jesucrist. ²⁰iAbi' por guialrniabee ni rajp dux Dad ree Dios, rayalczi yaya'p reeman respejt goctēz! Amén.

Rugajpdioz ree b́en riladx Jesucrist b́en Tesalónica ree

²¹Gol bagajpdioz gra ree b́en ma naj xbejn Jesucrist, guiáad gra ree b́en riladx Jesucrist b́en za'nē' reen guie, rugajpdioz reeman lějt. ²²Gra ree b́en zojb ree guie, b́en ma naj ree xbejn Jesucrist, ně gra ree b́en rűjn sirv loj rey, ně reeman rugajpdioz lějt.

²³Dux Dad ree Jesucrist gűinle' gradi. Amén.